

**Nunatsinni tarnimikkut napparsimasut atugaat pillugit iliussissat pitsanngorsarneqarnissaat siunertaralugu nuna tamakkerlugu iliussissamik pilersaarummik Naalakkersuisut UKA2021- mi saqqummiusseqqullugit Inatsisartut aalajangiiffigisassaatut siunnersuut.**

(Inatsisartunut ilaasortaq, Mikivisuk Thomassen, Inuit Ataqatigiit)

**Akissuteqaat**

(Peqqissutsimut Naalakkersuisoq)

**Siullermeerneqarnera**

Naalakkersuisut siunnersuummut qujapput.

Tarnimikkut nappaatillit atugaat pillugit suliniutit pitsanngorsarneqartariaqartut Naalakkersuisut nassuerutigaa. Dronning Ingridip Napparsimmavissuani ukiuni arlalinni tarnimikkut napparsimasut immikkoortortaarfiani suliat amerliartorsimapput. Tamanna ilaatigut meeqqat inuusuttuaqqallu amerligaluttuinnartut tarnimikkut nappaatilinnut immikkoortortaarfimmuut attaveqartarnerisigut takuneqarsinnaavoq. Nunatsinni meeqqat sumiginnakkat amerliartornerat tunngavigalugu meeqqat inuusuttullu tarnimikkut nappaatillit sullinneqarnerat malunnaatilmik annertusiarporpoq soorlu aamma kommunini isumaginnikkut suliassaqarfit tamanna malugigaa. Suliniutit tarnimikkut nappaatilinnut tunngasut suli nukingernerulernissaat naatsorsuutigineqarpoq. Taamaattumik inuit tarnimikkut nappaateqartut pillugit suliniutit tullinnguuttut Naalakkersuisuniik sulissutigineqarput:

Meeqqat inuusuttuaqqallu tarnimikkut nappaatillit taamatulluunniit pasineqartut pillugit ataqatigiinnerusumik aalajangiinissamut tunngavissamik suliartoqarpoq. Taassuma ataani aqqis-suussaannermi oqartussaasut assigiinngitsut sulianik isumaginnittut akornanni ikaarsaariarnerit ajornakusoorsinnaasut oqaatigineqarpoq. Taamaattumik tarnikkut nappaatilinnut suliallit suleqatigiinnerat pitsanngorsarneqartariaqarpoq erseqqissarneqarlunilu.

Nuummi tarnimikkut nappaatillit katsorsarnissannut illussaannik nutaamik sananissaq sulissutigineqarpoq. 2015-imi tamatuminnaga pilersaarusiornermut aningaasaliissutit Aningaasat pillugit inatsimmut ilanngunneqarput. Sanaartukkap 2022-mi imaluunniit 2023-mi naammassineqarnissaa naatsorsuutigineqarpoq.

Meeqqat inuusuttuaqqallu tarnimikkut nappaatilinnik suliartoqartut aamma Pitsaaliuinermit Isumaginninnermullu Pissutsinut Aqutsisoqarfiup ataani Meeqqat pillugit Angalaqatigiittartut qaninnerusumik suleqatigiinnissaat sulissutigineqarpoq. Sulinermit meeqqanik inuusuttuaqqanillu kinguaassiuutimikkut atorerlugaasimasunik qulaajaanissat katsorsaanissarlu siunertarinerqarput. Tamanna meeqqanik kingunerlutsitsisunik angalaqatigiittartut nunatsinni meeqqanut inuusuttunullu atugarliortunut pitsaanerumik suliniuteqarnissaq pillugu kalaallit qallunaallu oqartussaasoqarfiisa assigiinngitsunik suliassat akornanni suleqatigiineq pissaaq.

Suliniut tamanna Dronning Ingridip Napparsimavissuani tarnimikkut napparsimasut immikkoortortaarfianut annerusumik suliassaqarnerulersitsissaaq, innersuussutit amerlinissaat naatsorsuutigineqarsinnaammat.

Angerlarsimaffeqanngitsut amerlassusiat aamma angerlarsimaffeqannginnermi pissutsit pillugit qulaajaanit aallartinneqarsimapput. Taamatut misissuinnermi tarnimikkut napparsimasut angerlarsimaffeqanngitsuunermik qanoq eqqorneqartigisimanerannik paasissutissanik suku-miinerusunik imaqarumaartoq naatsorsuutigineqarpoq. Qulaajaaneq Inatsisartut 2021-mi upernaakkut ataatsimiinneranni saqqummiunneqassaaq.

Tamassuma saniatigut erseqqissaatigineqassaaq COVID-19-neqaraluartoq tarnimikkut nappaatilinnut suliat ukkatarineqarmata, tassani ilaalluni najukkami tarnimikkut nappaatilinnik sullissineq aamma angerlarsimaffinni pulaartarnej ingerlaannarmata.

Maanakkut suliniuteqartoqaraluartoq tarnimikkut napparsimasunut neqeroorutit tamarmiusut pitsanngorsartariaqartut Naalakkersuisut miserratiginngilaat inuimmi tarnimikkut nappaatillit inuttut allatulli ajornartorsiutiminnik ikiorserneqarnissaminut siunnersorneqartussaataallutillu tapersorneqartussaataammata.

Inuit tarnimikkut nappaatillit suliniuteqarfigineqarnerat pitsanngorsarniarlugu nuna tamakkerlugu atuuttussamik iliuusissatut pilersaarusiortoqarnissaa Naalakkersuisut pingaartutut isigaat. Maanakkut COVID-19-imik ajornartorsiuteqarneq aamma tamatuma sulisoqarnikkut aningaasatigullu isumalluutinik atuisariaqarfigineqarnerata malitsigisaanik piffissaliussatut siunnersuutigineqartumi iliuusissatut pilersaarusiortoqarsinnaasorinnittoqanngilaq.

Taamaattumik Naalakkersuisut imatut allannguutissatut siunnersuuteqarput: **Nunatsinni tarnimikkut nappaatillit atugaat pillugit iliuusissat pitsanngorsarneqarnissaat siunertaralugu nuna tamakkerlugu iliuusissamik pilersaarummik Naalakkersuisut UKA2022-mi saqqummiusseqqullugit Inatsisartut aalajangiiffigisassaattut siunnersuut.**